


蜀漢本末

一



據中國國家圖書館藏元至  
正十一年建寧路建安書院  
刻本影印原書版框高二十  
四·五釐米寬十七·四釐米



漢帝世次



太祖高皇帝姓劉氏諱邦字季在位十二年

孝惠皇帝丁未元年七年

高皇后呂氏甲寅元年八年

太宗孝文皇帝壬戌元年二十三年

孝景皇帝乙酉元年十六年

世宗孝武皇帝辛丑元年五十四年

孝昭皇帝弗陵元年十三年

中宗孝宣皇帝戊申元年二十五年

孝元皇帝癸酉元年十六年

孝成皇帝己丑元年十六年

孝哀皇帝乙卯元年六年

孝平皇帝辛酉元年五年

孺子嬰丙寅元年三年

統絕王莽篡國改號十四年


帝玄癸未元年二年

世祖光武皇帝乙酉元年三十三年

顯宗孝明皇帝戊午元年十八年

肅宗孝章皇帝丙子元年十三年

孝和皇帝己丑元年十七年



孝殤皇帝 丙午元年 一年

孝安皇帝 丁未元年 十九年

孝順皇帝 丙寅元年 十九年

孝冲皇帝 乙酉元年 一年

孝質皇帝 丙戌元年 一年

孝桓皇帝 丁亥元年 二十一年

孝靈皇帝 戊申元年 二十二年

孝獻皇帝 庚午元年 三十一年

昭烈皇帝 辛丑元年 二年

帝禪 癸卯元年 四十一年

右漢有天下自高帝元年乙未至帝禪四十一年癸未凡四百五十九年

# 漢帝世系之圖

高帝文帝景帝武帝

肥齊悼章城陽喜共延項義敬武惠順荒憲武節萌嗣盆子

惠帝

濞戾太進恒宣帝元帝成帝

膊昌邑賀海

昭帝

康富哀帝

興中山平帝

顯定安嬰公

發長沙買壽陵熊渠戴利壽張帝玄

外魯林回鉅鹿欽南頓演齊武

勝中山貞魯城侯

光武明帝章帝和帝殤帝

慶清河安帝順帝沖帝

伉千乘龐樂安鴻北海質帝

壽卷懿北鄉

開南翼魯桓帝

帝拜

又解袁臨靈帝獻帝

往康弘昭烈帝禪

中間世次  
史失其傳

蜀漢本末卷上



趙居信集錄

昭烈皇帝諱備字玄德中山靖王之後也以桓帝延熹四年生於涿郡

中山靖王名勝景帝之子也有子曰貞武帝元朔二年封涿郡陸城侯坐酎金失侯因家焉其後有名雄者舉孝廉官至東郡范令雄生弘亦仕州郡弘生昭烈昭烈美丰儀身長七尺五寸垂手下膝顧自見其耳有大志少言語喜怒不形於色少孤與母販履織席爲業舍東南有桑高五丈餘童童若車蓋往來者恠其非允或謂當出貴人昭烈少時戲樹下曰吾必乘此羽葆車叔父敬曰汝勿妄言滅吾門矣

靈帝熹平四年學於郡人前九江太守盧植

年十五母使行學與宗人劉德然遼西公孫瓚俱事植於緱氏山中德然父元起常資給昭烈與德然同其妻曰各自一家何能常爾耶元起曰吾宗中此兒非常人也瓚亦深與昭烈相友昭烈以兄事之

及長又從潁川陳紀北海鄭玄游

昭烈好交結善下人豪俠少年爭附之中山大商張世平蘇雙等販馬周旋於涿郡見而異之乃多與金財昭烈由是得用合徒眾

中平元年黃巾賊張角等起魏郡所在響應昭烈於鄉里合徒眾從校尉鄒靖討之有功除安喜尉六年從都尉母丘毅詣丹陽募兵與賊遇於下邳力戰有功除下密丞尋去官○是歲帝崩子辯立前將軍董卓以兵入朝自為司空廢少帝為弘農王立其庶弟協又自為相國弒皇太后何氏

獻帝協初平元年卓弒少帝發諸陵燒洛陽宮廟劫帝遷都長安關東州郡各舉兵討卓

是時勃海太守袁紹河內太守王匡屯河內冀州牧韓馥留鄴給其軍糧紹從弟後將軍術長沙太守孫堅屯魯陽豫州刺史孔伷屯潁川兗州刺史劉岱陳留太守張邈邈弟廣陵太守超東郡太守橋瑁山陽太守袁遺濟北相鮑信驍騎校尉曹操俱屯酸棗眾谷數萬未即進兵久之食盡而散獨孫堅率兵擊卓敗之乃入洛陽修塞諸陵而還

昭烈時為高唐令往依奮武將軍公孫瓚於薊

以爲別部司馬守平原令

二年春二月卓自爲太師○昭烈爲平原相東屯於齊統屬青州刺史田楷

公孫瓚使昭烈與其將田楷徇青州有功因以爲平原相昭烈少與關羽張飛相交善及合徒衆羽時亡命在涿郡與飛爲之禦侮羽年長數歲飛兄事之至是以羽飛爲別部司馬分統部曲昭烈與之寢則同床恩若兄弟而稠人廣坐侍立終日隨昭烈周旋不避艱險羽字雲長河東解人飛字益德涿郡人也

蜀漢本末卷二

致堂胡氏寅曰人之常情親則慢嚴則踈惟以德者和而不失其正此非一日之積也玄德與關張少相交善恩若兄弟而無慢易之失侍立終日不避艱險而無睽踈之態不惟見玄德之行義修整而羽飛二人於賢者能狎而敬之畏而愛之其與庸愚遠矣且其卓然有立也歟

趙雲者將常山吏兵詣公孫瓚瓚曰聞貴州人皆願袁氏君何獨迷而能反乎雲曰天下誦誦未知孰是民有倒懸之厄鄙州論議從仁政所



在不爲忽袁公私明將軍也昭烈見而竒之深  
加接納雲遂從昭烈至平原爲主騎兵雲字子  
龍常山真定人○是時人民飢饉屯聚鈔暴昭  
烈外禦寇難內豐財施士之至者必與同席而  
坐同簋而食由是衆多歸焉郡民劉平素輕昭  
烈耻爲之下使客刺之客不忍刺語之而去其  
得人心如此

後將軍袁術使長沙太守孫堅擊荊州牧劉表表  
軍射殺之

三年司徒王允使中郎將呂布討董卓誅之卓黨  
李傕郭汜樊稠張濟舉兵犯闕殺允皆自爲將軍  
呂布東走

是時袁紹逐刺史韓馥據冀州袁術逐刺史陳  
溫據揚州曹操因刺史劉岱死據兗州公孫瓚  
殺刺史劉虞據幽州其餘益州牧劉璋荊州牧  
劉表徐州牧陶謙各據其境所在州郡咸擁重  
兵務相兼并以自強大由是卓黨得肆其凶

四年秋東郡太守曹操擊徐州牧陶謙

興平元年春二月昭烈救之謙表爲豫州刺史屯  
小沛

謙告急於田楷楷與昭烈救之昭烈自有兵數千人謙益以丹陽兵四千昭烈遂去楷歸謙夏四月與操戰於郟東敗績會陳留太守張邈迎呂布以攻操操乃還○冬十二月陶謙卒州人奉昭烈兼領徐州駐下邳

謙疾篤謂別駕麋竺曰非玄德不能安此州也謙卒竺率州人迎昭烈昭烈未敢當曰袁公路近在壽春此君四世五公海內所歸君可以州與之典農校尉陳登曰公路驕豪非治亂之主今欲爲使君合步騎十萬上可以匡主濟民下

可以割地守境若使君不見聽許登亦未敢聽使君也北海相孔融曰袁公路豈憂國忘家者耶冢中枯骨何足介意今日之事百姓與能天與不取悔不可追昭烈遂領徐州登等遣使報袁紹紹答書曰玄德弘雅有信義今徐州樂戴之誠副所望也麋竺字子仲東海朐人也祖世貨殖僮客萬人貲產鉅億而雍容敦雅故謙辟爲別駕從事

袁術表孫堅子策爲懷義校尉○詔以劉繇爲揚州刺史

二年春正月曹操敗呂布於定陶○詔即拜袁紹為右將軍○二月李傕殺樊稠攻郭汜劫帝入其營夏汜攻傕傕遷帝於北塢自為大司馬○曹操攻破定陶呂布張邈走留邈弟廣陵太守超守雍丘布歸昭烈邈為其下所殺操圍雍丘城潰超自殺○六月張濟迎帝東歸秋七月發長安冬十二月至弘農濟復反與李傕郭汜合追帝至陝帝渡河入將軍李樂營○孫策擊劉繇於曲阿破走之遂據吳郡○是歲詔以曹操為兗州牧

建安元年夏六月昭烈與袁術戰於盱眙呂布襲取下邳昭烈請降於布遂與并兵擊術

術攻昭烈以爭徐州昭烈使司馬張飛守下邳自將拒術於盱眙淮陰相持經月更有勝負下邳相曹豹陶謙故將也與飛相失飛殺之城中乖亂袁術與呂布書勸令襲下邳許助以軍糧布大喜引軍水陸東下中郎將許耽開門迎之張飛敗走布虜昭烈妻子及將吏家口昭烈聞之引還比至下邳兵潰昭烈收餘兵東取廣陵與袁術戰又敗屯於海西饑餓困蹶吏士相食從事糜竺進其妹於昭烈以為夫人奴客凡二

千人又以金銀以助軍資于時困匱賴此  
復振昭烈請降於布布亦忽術運糧不繼乃復  
昭烈為豫州刺史與并勢擊術使屯小沛布具  
刺史車馬童僕發遣昭烈妻子部曲家屬於泗  
水上祖道相樂

胡氏曰三國之主唯備為賢操才過之而  
實小人備有德義蓋君子也非漢德告終  
則寶祚宜之備矣備不獨不得中天下而  
立經營於群雄間崎嶇艱阻僅得鼎足而  
操先挾天子據有形勢光濟大業斯則天  
運非人謀也呂布何者備乃降之其屯難  
盤桓以貴下賤之象也

曹操表昭烈為鎮東將軍封宜城亭侯○秋七月  
帝還雒陽曹操入朝自為司隸校尉錄尚書事遷  
帝於許又自為大將軍封武平侯○孫策取會稽  
○冬十月詔以袁紹為太尉曹操自為司空○呂  
布復攻昭烈昭烈兵敗歸許詔以為豫州牧遣東  
屯小沛

袁術為子求婚於布布許之術遣將紀靈等攻  
昭烈昭烈求救於布布左右曰將軍常欲殺劉

備今可假手於術布曰不然術若破備則北連  
泰山諸將吾為在術圍中不得不救也馳赴之  
謂靈等曰玄德布弟也為諸君所困故來救之  
靈等乃罷昭烈合兵得萬餘人布惡之自出兵  
攻昭烈昭烈敗走歸曹操操厚遇之以為豫州  
牧益其兵給糧食使東至沛收散兵以圖呂布  
操謀臣郭嘉說操曰劉備有雄才而得衆心關  
羽張飛皆萬人之敵為之死用終不為人下也  
宜早為之所操方招懷英雄不從

尹起莘綱目發明曰分注載呂布救昭烈

蜀漢本末卷上

八

之事而綱目止書布攻昭烈者布反覆小  
人不予其救也分注述昭烈歸曹操而綱  
目乃書歸許者言歸許則見其歸天子也  
分注述操以昭烈為豫州牧而綱目乃書  
詔以為豫州牧者言詔則見出於朝廷而  
非操所得用也惟昭烈有存漢之心綱目  
有予昭烈之意故其書法如此後此四年  
書詔昭烈將兵邀袁術其義亦然

張濟攻穰城敗死族子繡以其衆歸荊州  
二年春正月曹操擊張繡降之未幾復叛○袁術

潛稱帝○三月詔以袁紹為大將軍兼督冀青幽并四州○夏五月詔以呂布為左將軍布擊袁術兵破之○詔以孫策為會稽太守討術○秋九月曹操擊術破走之○將軍揚奉寇掠徐揚間昭烈誘而斬之

尹氏曰揚奉宜書誅而不書者誘而殺之不得為天討也

三年春曹操擊張繡○夏四月將軍段煨等討李傕夷三族郭汜亦為人所殺○曹操引兵還五月劉表救張繡操擊破之繡復追敗操軍○秋九月呂布復攻昭烈破沛城昭烈敗還與操會於梁冬十月共攻下邳十二月禽布誅之

布復與袁術通遣其將高順張遼攻昭烈曹操遣將夏侯惇救之為順等所敗順等遂破沛城虜昭烈妻子昭烈單身走操自出東行助昭烈圍布於下邳生禽之布既至謂昭烈曰玄德鄉為坐上客我為降虜繩縛我急獨不可一言耶操笑曰縛虎不得不急乃命緩布縛昭烈曰不可公不見呂布事丁建陽董太師乎布曰大耳兒最巨信操乃命縊殺之

詔以昭烈為左將軍

昭烈從操還許表為左將軍禮之愈重出則同輿坐則同席

詔以孫策為討逆將軍封吳侯○袁紹攻公孫瓚圍之

四年春三月瓚自焚死○夏袁術北走詔昭烈將兵邀之術還走死○秋八月曹操軍於黎陽以備袁紹九月還許分兵守官渡冬十一月張繡降操○孫策取廬江豫章○曹操復屯官渡昭烈起兵徐州討操以司馬關羽守下邳操遣兵擊之

史記卷之...

十

昭烈之未出也帝舅車騎將軍董承受帝衣帶

中密詔與昭烈謀誅操操一日從容謂昭烈曰

今天下英雄惟使君與操耳本初之徒不足數

也昭烈方食失匕箸值天雷震昭烈因曰聖人

云迅雷風烈必變良有以也遂與承及長水校

尉种輯將軍吳蘭王服同謀會昭烈率朱靈等

出邀袁術操謀臣董昭諫曰劉備勇而志大關

羽張飛為之羽翼恐其心未可得論也程昱郭

嘉亦皆謂備不可遣操悔追之不及術既南走

靈等兵還昭烈遂斬徐州刺史車胄留關羽守

下邳行太守事身還東海人昌獬及郡縣  
以叛操為禡

建其將劉岱王忠

操自

字公

昭烈

辟為從事

尹氏曰自曹操劫遷天子以來天下已非

漢有董承以元舅之尊親承密詔與昭烈

謀誅操而不克故昭烈在徐曰遂起兵然

前史未有書其討操者獨范史載董承等

受密詔誅操其立義頗精然不言昭烈討

操之舉至陳壽志魏反謂董承等謀反伏

誅其謬妄無理莫甚於此及其志蜀始於

昭烈稱漢中王之下錄其與董承等同誅

操之語此則實事難泯不可得而曲說者

也綱目於此特筆起義其曰起兵徐州討

曹操者正所以扶三綱立人極誅亂臣賊

子於千百載之下使古今大義無時而不

明要使逆亂之徒終無以自立於天下其

垂世教也大矣故曰綱目修而亂臣賊子

懼



五年春正月操殺車騎將軍董承遂擊徐州昭烈與戰敗績奔冀州操進軍陷下邳獲關羽以歸

董承謀洩操殺承及王服種輯皆夷三族操欲自擊昭烈諸將皆曰與公爭天下者袁紹也今

紹方來而棄之東紹棄人後若何操曰劉備人傑也今不擊必為後患遂敗昭烈於沛盡收其

眾獲昭烈妻子進破下邳獲關羽以為偏將軍禮之甚厚又擊昌豨破之昭烈奔青州因刺史

袁譚以歸袁紹紹聞其至身去鄴二百里迎之駐月餘所亡士卒稍稍歸之初趙雲以兄喪暫

蜀漢志卷之六十一

一二

歸昭烈捉手而別雲曰終不肯德也至是雲見於鄴昭烈與之同床寢息密遣募兵得數百人皆稱劉左將軍部曲

二月操還官渡袁紹進軍黎陽夏四月紹遣其將顏良攻白馬操遣關羽等擊之羽斬良遂破紹軍操表封羽漢壽亭侯

紹遣其大將顏良攻東郡太守劉延於白馬操使張遼及羽為先鋒擊之羽望見良麾蓋策馬

刺良於萬眾之中斬其首而還紹軍莫敢當者遂解白馬之圍

羽來歸

初操壯羽之為人而察其心神無久留之意使張遼以其情問之羽嘆曰吾極知曹公待我厚然吾受劉將軍厚恩誓以共死不可背也吾終不留要當立効以報曹公乃去耳遼以羽言報操操義之及羽殺良操知其必去重加賞賜羽盡封其所賜拜書告辭而犇昭烈於袁軍左右欲追之操曰彼各為其主勿追也

胡氏曰曹操雖忌刻然於昭烈之來關羽之去皆能容之度外斯其所以見稱英雄者歟且以利害計之昭烈不死輔以關張縱不能爭操天下然豈不為四肢大害招之焉肯來討之安能克昭烈不死知操不得安枕而卧矣然操不計後患務推誠信以來俊傑既付以州牧之重又資以兵食之助雖勉而行之亦可見其審於取舍增智而明之廓量而大之固霸王之器也

討逆將軍吳侯孫策卒弟權代領其衆○秋昭烈將兵略汝潁之間自許以南吏民多應之與操兵戰不利還於袁紹軍未幾復以紹兵至汝南擊破

操兵斬其將蔡陽

汝南黃巾劉辟等皆應紹紹使昭烈與辟等略地操使其將曹仁擊之昭烈引還陰欲離紹乃說紹南連劉表紹遣昭烈將本兵復至汝南與土豪龔都等合數千人遂敗操將蔡陽斬之

九月紹攻操於官渡冬十月操襲破其輜重紹軍大潰○詔以孫權為討虜將軍○劉表攻長沙零陵桂陽皆下之○益州司馬張魯據漢中

六年夏四月曹操擊表紹倉亭破之○秋九月操擊昭烈於汝南昭烈奔荊州

操自將擊昭烈於汝南昭烈先遣從事麋竺孫乾使荊州與劉表相聞至是遂奔表龔都等皆散表聞昭烈至自出郊迎以上賓禮待之益其兵使屯新野昭烈以麋竺孫乾簡雍為左將軍從事中郎雍字憲和涿郡人少與昭烈有舊及起兵因隨之後領徐州又得麋竺孫乾與雍並為談客往來使命咸如意指皆以賓友待之

張魯取巴郡詔以魯為漢寧太守

七年春正月曹操復進兵官渡夏五月袁紹卒幼子尚襲行州事長子譚出屯黎陽操攻敗之○昭

烈將兵至葉大敗操兵於博望

劉表使昭烈北至葉操遣其將夏侯惇于禁等拒之昭烈一旦燒屯去惇等追之入伏裏兵大敗生禽其將夏侯蘭趙雲鄉人也雲不以自近而薦其明於法律昭烈即以為軍正

八年春二月操攻黎陽表譚袁尚敗走操追至鄴遠

九年操攻鄴破之遂自領冀州收袁紹甥并州刺史高幹以州降操操攻譚於平原破之譚奔南皮十年春操克南皮斬譚譚弟幽州刺史熙及弟尚奔烏桓熙將吏以州降操○冬十月高幹復叛操十一年操擊幹斬之○烏桓寇邊

十二年夏操北擊烏桓秋八月破之斬蹋頓單于袁熙袁尚奔遼東太守公孫康斬之

昭烈在荊州數年嘗於表坐起至厠慨然流涕表怪問之昭烈曰平常身不離鞍髀裏肉消今不復騎髀裏肉生日月如流老將至矣而功業不建是以悲耳及操擊烏桓昭烈說劉表襲許表不能用及聞操還表謂昭烈曰不用君言失此大會昭烈曰今天下分裂日尋干戈事會之

來豈有終極若能應之於後此未足為恨也  
胡氏曰學道而畫則學不進修德而止則  
德不立從政而怠則政有闕處事而倦則  
事無紀故天以健而久日以常而明莫大  
之功成於堅忍丕天之業本於持守惟聖  
人盡之賢者則勉勉焉玄德崎嶇戎馬之  
間如神龍之在陂澤無所因而飛騰也降  
於呂布歸於曹操借勢於袁紹為客於劉  
表兵日以弱迹日以孤而氣不少挫志不  
少懾悲功業之不建悼歲月之如流及劉  
表悔不用其言乃有事會無極之語以能  
應之於後為貴不以失之於前為恨是以  
坎壈而不陷困窮而致亨終能取分於曹  
操孫權之間巍然鼎峙此光武所謂有志  
事竟成者歟

昭烈見諸葛亮於隆中

潁川徐庶見昭烈於新野昭烈噐之庶曰諸葛  
孔明卧龍也將軍豈願見之乎昭烈曰君與俱  
來庶曰此人可就見不可屈致也將軍宜枉駕  
顧之昭烈由是詣亮凡三往乃見因屏人曰漢

室傾頹姦臣竊命孤不度德量力欲信大義於天下而智術淺短遂用猖蹶至於今日然志猶未已君謂計將安出亮曰今曹操已擁百萬之衆挾天子而令諸侯此誠不可與爭鋒孫權據有江東已歷三世堅策權也國險而民附賢能爲之用此可與爲援而不可圖也荊州北據漢沔利盡南海東連吳會西通巴蜀此用武之國而其主不能守此殆天所以資將軍也

西山真氏德秀曰按是時劉表猶在孔明已逆知其不能守可謂善覘人之國矣

益州險塞沃野千里天府之土高祖因之以成帝業劉璋暗弱張魯在北民殷國富而不知存恤智能之士思得明君將軍既帝室之胄信義著於四海總攬英雄思賢如渴若跨有荊益保其崑阻西和諸戎南撫夷越外結孫權內修政治天下有變則命一上將將荊州之軍以向宛雒將軍身帥益州之衆出於秦川百姓孰不箠食壺漿以迎將軍者乎

真氏曰或言孔明不當勸昭烈取荊益愚謂荊益漢之荊益也漢不能有而二人據

之昭烈漢之胄也取之以興漢其名義豈不甚正乎

誠如是則霸業可成漢室可興矣昭烈曰善於是與亮情好日密關羽張飛不悅昭烈解之曰孤之有孔明猶魚之有水也願諸君勿復言羽飛乃止

真氏曰按孟子曰故將大有為之君必有不可召之臣其尊德樂道不如是不足與有為也故湯之於伊尹桓公之於管仲皆不敢召孔明其以伊管自處歟若昭烈者真可與大有為矣

亮字孔明琅琊陽都人早孤以從父玄與劉表有舊往依之玄卒亮遂家於南陽之鄧縣在襄陽西二十里號曰隆中身長八尺躬耕隴畝好為梁父吟

真氏曰按其吟今存專譏晏子以二桃殺三士或謂譏曹操之殺孔融輦雖未必然要亦有所為也

初與徐庶及潁川石韜汝南孟建游學每晨夜從容抱膝長嘯謂三人曰卿諸人可至郡守則

史也三人問其所至亮但笑而不言每自比管仲樂毅時人莫之許也唯庶與博陵崔州平謂為信然

胡氏曰三國人才之盛後世鮮及然孔明則高邁獨出眉山蘇子以為巍然三代之佐未易以世論斯言當矣孔明可亞於伊傳而以管樂自許者謙志也才與仲父等而德則過之或曰方諸子房如何曰是殆難以優劣論也然志士尚友願希孔明而未必為子房非謂葛賢於張亦非謂子房不逮孔明也此可與智者道耳君子有言劉備敏於曹操世多未喻以言起兵則備最在後以言成事則操先定都劉曄善料彼此者以為玄德有度而遲也愚謂英雄豪傑周游中土莫不以人才為急務方是時四方賢能隱而未見者繫人所聞知如何玄德南趨屯于新野豈知有孔明耶不然何其得徐庶一言遂屈躄枉駕三顧草廬資大計而委心腹乎比曹操下荊州所得者韓嵩蒯越和洽王粲之徒而天下



一流乃為玄德所有吳魏諸臣無能與對  
備敏於操殆謂是耶

穎川司馬徽清雅有知人之鑑時在襄陽昭烈  
訪士於徽徽曰腐儒俗士豈識時務識時務者  
在乎俊傑此間自有伏龍鳳雛問其為誰曰諸  
葛孔明龐士元也士元名統襄陽人少時樸鈍  
未有識者唯從父德公重之使往見徽徽時採  
桑於樹坐統樹下與之共語自晝至夜徽甚敬  
異焉其當為南州士之冠冕德公素有重名徽  
元事之諸葛亮每至其家獨拜床下德公初不

令止德公常謂亮為卧龍統為鳳雛徽為水鑑  
故徽與昭烈語而稱之庶字元直韜字廣元建  
字公威徽字德操州平德公皆字也史失其名  
尹氏曰自三代衰王政廢士之隨世以就  
功名者多矣當漢之末群雄雲擾凡一智  
一能之士莫不乘時奮發斬以自見孰謂  
一世人龍如孔明者方且高卧隆中抱膝  
長吟略無意於當世而又以管樂自許者  
哉向使昭烈不垂三顧之勤則將槁死巖  
穴與草木俱腐耳及其一起則功名事業

彪炳顯著不可得而泯沒亮豈大言無當者彼其擇理甚精而處已甚明謂枉已不可以直人也故不苟合以求售謂托身不可以非所也故不苟仕於僭竊時乎未遇則高蹈丘園道苟可行則奮志事業君臣既合魚水相懽則聲大義於天下使興衰繼絕翊扶正統之志昭如日星然後篡竊之徒其罪始暴白而不可掩是豈區區一智一能之士隨世以就功名者可同日語哉書昭烈見諸葛亮於隆中其猶聘莘野訪渭濱者越千載如出一轍嗚呼三代而下孰謂出處之正有如孔明者哉不有君子表而出之則孔明亦後世人物耳噫

十三年夏六月罷三公官曹操自為丞相秋七月南擊劉表八月表卒次子琮嗣州事九月操至新野琮舉州降昭烈奔江陵操追及於當陽中郎將張飛拒之操入江陵昭烈由漢津至夏口

初劉表愛琮欲以為嗣長子琦謀自安之術於諸葛亮亮不對後共升高樓因令去梯謂亮曰今日上不至天下不至地言出子口而入吾耳

可以言未亮曰君不見申生在內而危重耳居  
外而安乎琦意感悟求為江夏太守表卒琮領  
荊州牧曹操南征琮恐懼遂舉州降以節迎操  
時昭烈屯樊琮不敢告久之乃覺遣所親問琮  
琮令其官屬宋忠詣昭烈宣旨時操已在宛昭  
烈乃大驚駭謂忠曰卿諸人作事如此不早相  
語今禍至方告我不亦太劇乎引刀向忠曰今  
斷卿頭不足解忿亦耻丈夫臨別復殺卿輩遣  
忠去乃呼部曲共議諸葛亮勸昭烈攻琮荊州  
可得昭烈曰劉荊州臨亡託我以孤遺背信自  
濟吾所不為死何面目見劉荊州乎昭烈將其  
衆去過襄陽駐馬呼琮琮懼不能起琮左右及  
荊州人多歸昭烈昭烈過辭表墓涕泣而去比  
到當陽衆十萬餘人輜重數千兩日行十餘里  
別遣關羽乘舡數百艘使會江陵或謂昭烈曰  
宜速行保江陵今雖擁大衆被甲者少若曹操  
兵至何以拒之昭烈曰夫濟大事必以人為本  
令人歸吾吾何忍棄去

習鑿齒論曰劉玄德雖顛沛險難而信義  
愈明勢逼事危而言不失道追景升之顧

則情感三軍戀赴義之士則甘與同敗終  
濟大業不亦宜乎

操以江陵有軍實恐昭烈據之乃釋輜重輕軍  
到襄陽聞昭烈已過操將精騎五千急追之一  
日一夜行三百餘里及於當陽之長坂昭烈棄  
妻子與諸葛亮張飛趙雲數十騎走操大獲其  
人衆輜重徐庶母為操所獲庶辭昭烈指其心  
曰本欲與將軍共圖王霸之業者以此方寸之  
地也今已失老母方寸亂矣無益於事請從此  
別遂詣操張飛將二十騎拒後飛據水斷橋瞋

目橫矛曰身是張益德也可來共決死操兵無  
敢近者或謂昭烈曰趙雲已北走昭烈以手戟  
擗之曰子龍不棄我走也頃之雲身抱昭烈子  
禪及保衛禪母甘夫人與俱至昭烈斜趣漢津  
適與關羽舡會得濟沔遇劉琦衆萬餘人俱到  
夏口甘夫人沛人也昭烈領豫州屯小沛納以  
為妾昭烈數喪嫡室常攝內事隨至荊州生禪  
未幾病卒

### 諸葛亮使江東

初孫權僚屬魯肅聞劉表死謂權曰乞奉命弔

表二子及結劉豫州且以觀變肅未至而琮已  
降操遂迎昭烈於當陽長坂因宣權旨致懇勸  
之意且勸與權相結昭烈進住樊口聞操欲順  
江東下諸葛亮曰事急矣請奉命求救於孫將  
軍遂與魯肅俱詣權時權擁兵柴桑觀望成敗  
亮說權曰海內大亂將軍起兵江東劉豫州收  
衆漢南與曹操並爭天下今操芟夷大難略已  
平矣遂破荊州威震四海英雄無用武之地故  
豫州遁逃至此願將軍量力而處之若能以吳  
越之衆與中國抗衡不如卑與之絕若不能何

不按兵束甲北面而事之今將軍外託服從之  
名而內懷猶豫之計事急而不斷禍至無日矣  
真氏曰按此所以激發權也  
權曰苟如君言劉豫州何不遂事之乎亮曰田  
橫齊之壯士耳猶守義不辱况豫州王室之胄  
英才蓋世衆士慕仰若水之歸海若事之不濟  
此乃天也安能復為之下乎

真氏曰重激發之

權勃然曰吾不能舉全吳之地十萬之衆受制  
於人吾計決矣非劉豫州莫可以當曹操者然

豫州新敗之後安能抗此難乎亮曰豫州軍雖  
敗於長坂今戰士還者及關羽水軍精甲萬人  
劉琦合江夏戰士亦不下萬人曹操之衆遠來  
疲蔽聞追豫州輕騎一日一夜行三百餘里此  
所謂疆弩之末勢不能穿魯縞者也故兵法忌  
之曰必蹶上將軍且北方之人不習水戰又荆  
州之民附操者徧兵勢耳非心服也今將軍誠  
能命猛將統兵數萬與豫州協規同力破操必  
矣操破必北還如此則荆吳之勢疆鼎足之形  
成矣成敗之機在於今日權大悅曹操左右皆  
以為孫權必害昭烈程昱曰公今無敵於天下  
孫權不能獨當也劉備有英名關羽張飛皆萬  
人之敵權必資之以禦我難解勢分備資以成  
又不可得而殺也

冬十月曹操東下孫權遣將周瑜魯肅等與昭烈  
迎擊於赤壁大破之操留其將曹仁守江陵樂進  
守襄陽乃引還

操與權書曰近者奉辭伐罪劉琮束手今治水  
軍八十萬衆方與將軍會獵於吳權以示群下  
莫不失色皆勸權迎之獨魯肅與周瑜力排衆

議贊其拒敵權乃以瑜與舊將程普為左右督將兵肅為贊軍校尉助畫方略與昭烈并力逆操昭烈及瑜軍會於樊口操進與遇於赤壁瑜部將黃蓋詐降於操焚其舟舡延及岸上營落煙炎張天人馬燒溺死者甚衆瑜等率輕銳繼其後雷鼓震天北軍大壞操引軍從華容道步走遇泥濘道不通天又大風悉使羸兵負草填之騎乃得過羸兵為人馬所踏藉往往陷死泥中昭烈與大軍水陸並進追操至南郡時操軍兼以饑疫死者大半操乃引軍北還

尹氏曰赤壁之勝吳人專有其功是以他日荊州之爭關羽方詰魯肅以謂烏林之後左將軍親在行間戮力破賊而魯肅則謂始興豫州觀於長坂志勢摧弱主上矜愆以濟其患如此則其功固有所歸矣今綱目於此乃書瑜肅等與備迎擊破之何哉蓋當曹操東下之時吳人震懼謀欲迎操雖有周瑜魯肅定謀於內然非昭烈孔明左右感激於外則亦未必成功若是之捷觀之柴桑之說則可見矣書法如此蓋

亦推求其實而權其輕重耳夫豈過哉  
十二月孫權圍合肥○昭烈表劉琦為荊州刺史  
乃引兵徇荊州江南諸郡降之

昭烈南徇四郡武陵太守金旋長沙太守韓玄  
桂陽太守趙範零陵太守劉度皆降廬江營帥  
雷緒率部曲數萬口歸昭烈昭烈以諸葛亮為  
軍師中郎將使督零陵桂陽長沙三郡調其賦  
稅以充軍實以關羽為盪寇將軍襄陽太守駐  
江北張飛為征虜將軍宜都太守趙雲為偏將軍  
領桂陽太守代趙範範寡嫂樊氏有國色欲以  
歸雲雲曰相與同姓鄉兄猶我兄也固辭或勸  
雲納之雲曰天下女子豈少耶竟不取

十四年春三月孫權引兵還○秋七月曹操軍合  
肥冬十二月引兵還○劉琦卒孫權表昭烈以左  
將軍領荊州牧

昭烈表權行車騎將軍領徐州牧會劉琦卒權  
復表昭烈領荊州昭烈乃辟南州名士馬良良  
弟謨廖立陳震鄧方張存等為從事殷觀為主  
簿又以向朗督秭歸夷道巫山夷陵四縣軍民  
事良字季常謨字幼常襄陽宜城人兄弟五人



並有才名里諺曰馬氏五常白眉最良良眉中  
有白毛故以稱之立字公淵武陵臨沅人震字  
孝起方字孔山存字處仁皆南陽人觀字孔休  
朗字巨達宜城人少師司馬徽與龐統徐庶甚  
親善劉表時為所○權所署南郡太守周  
瑜分荊州南岸地以給昭烈昭烈立營於油口  
改名公安權以妹妻之夫人才捷剛猛有諸兄  
之風侍婢百餘皆執刀侍立昭烈入內心常凜  
凜

十五年詣孫權於京

蜀漢本末

劉表故吏士多歸昭烈昭烈以周瑜所給地少  
不足以容其衆乃詣京見權求都督荊州瑜上  
疏於權曰劉備以梟雄之姿而有關羽張飛熊  
虎之將必非久屈為人用者愚謂大計宜徙備  
置吳盛為築宮室多其美女玩好以娛其耳目  
分此二人各置一方使如瑜者挾與攻戰大事  
可定也今猥割土地以資業之聚此三人俱在  
疆場恐蛟龍得雲雨終非池中物也

胡氏曰瑜雖有智謀而為孫權畫此策何  
不知人之甚也劉玄德天下驍雄豈美

玩好所能淹留移惑哉正使孫權用其說孔明飛羽輩俱在外肯使其主落人掌握而無術以得之耶且瑜所虞者雲長益德而不及孔明又以見孔明雖來往吳中而未嘗見竒於公瑾不為所虞其智大矣瑜欲挾關張而用之不料關張不為已下是則四人者瑜智皆不足以知之也

諸將呂範等亦勸留之權以曹操在北方當廣擊英雄不從魯肅勸權以荊州借昭烈與共拒操權從之昭烈還公安久之乃聞瑜議嘆曰天下智謀之士所見略同時孔明諫孤莫行其意亦慮此也

以主簿殷觀為別駕從事

時周瑜等數勸孫權取蜀權遣使謂昭烈曰劉璋不武不能自守若使曹操得蜀則荊州危矣今欲先攻取璋次取張魯一統南方雖有十操無所憂也或謂宜報聽許觀進曰若為權先驅進未能克蜀退為權所乘即事去矣今但可贊其伐蜀而自說新據諸郡未可與動權必不能越我而西也如此則進退可以收吳蜀之利

烈從之權不聽遣其從兄瑜率水軍駐夏口昭  
烈使張飛守秭歸關羽屯夷陵諸葛亮據南郡  
而自駐尋陵權不得已召瑜還因遷觀別駕  
耒陽令龐統為治中從事

統性好人倫勤於長養初周瑜守南郡統為功  
曹每所稱述多過其才時人怪而問之統曰當  
今天下大亂雅道陵遲善人少而惡人多方欲  
興風俗長道業不美其譚即聲名不足慕企而  
為善者少矣今拔十失五猶得其半而可以崇  
邁世教使有志者自勵不亦可乎

真氏曰按士元以一功曹而獎進人才如  
此使其獲居相位則於天下之士長養成  
就當如何耶其言可為後世法而居人才  
衰少之日尤所當知故錄焉

後瑜卒統護其喪東歸復還荊州以從事守耒  
陽不治免官魯肅遺昭烈書曰龐士元非百里  
才也使處治中別駕之任始當展其驥足耳諸  
葛亮亦言之昭烈見統與之善譚大器之遂用  
為治中親待亞亮與亮並為軍師中郎將

真氏曰按昭烈親得統而親待亞於孔明

且遽使之同列而孔明不以為嫌子房世為叔孫通之貳亦此意也

交州服於孫權

十六年春三月曹操遣將鍾繇擊張魯偏將軍馬超等舉兵據潼關秋操擊破之

初操遣繇擊魯關中諸將馬超等疑為襲已於是與韓遂等十部皆舉兵拒操操自將擊之軍至蒲坂欲西渡渭超謂韓遂曰宜於渭北拒之不二十日河東穀盡彼必走矣遂不能聽操聞之曰馬兒不死吾無葬地也後以計離間超遂

更相猜疑軍以大敗超走保諸戎操追至安定引軍東還操將揚阜說操曰超有信布之勇甚得羗胡心若大軍東還不嚴其備隴上非吾有也操還超果率諸戎擊隴上隴上郡縣皆應之超字孟起扶風茂陵人父騰靈帝末與邊章韓遂等俱起兵西川初平三年遂騰率衆詣長安詔皆拜將軍騰後遣超隨司隸校尉鍾繇擊袁紹將郭援高幹於平陽超兵斬援還安十三年詔徵騰為衛尉以超為偏將軍代領騰衆至是與諸將進據潼關操遂殺騰夷三族

冬益州牧劉璋遣其校尉法正迎昭烈

初璋父焉興平初卒璋嗣立至是聞曹操已克  
荊州遣別駕張松致敬於操松為人短小放蕩  
然識達精果操時已定荊州不復存錄松松以  
此怨之歸勸璋絕操與昭烈相結璋從之時軍  
議校尉法正璋不能用又為其州里俱僞客者  
所鄙正邑邑不得志張松與正善亦自負其才  
忖璋不足與有為常竊嘆息因勸璋結昭烈璋  
曰誰可使者松乃舉正璋使正往正辭謝佯為  
不得已而行還為松說昭烈有雄略密謀奉戴  
以為州主會曹操遣鐘繇向漢中璋聞之內懷  
恐懼松因說曰曹操兵疆無敵於天下若因張  
魯之資以取蜀上誰能禦之劉豫州使君之宗  
室操之深讎也善用兵若使討魯魯必破魯破  
則益州疆曹操雖來無能為也今州中諸將龐  
羲李異等恃功驕豪欲有外意不得豫州則敵  
攻其外民攻其內必敗之道也璋然之法正將  
四千人迎昭烈正字孝直扶風郿人祖真有清  
節高名建安初正入蜀依劉璋久之為新都令  
後召署校尉

昭烈畜諸葛亮關羽張飛等守荊州與龐統法正  
西行

正至荊州陰獻策於昭烈曰以明將軍之英才  
乘劉牧之懦弱張招州之股肱響應於內以取  
益州猶反掌也昭烈疑未決龐統言於昭烈曰  
荊州荒殘人物殫盡東有孫車騎北有曹操難  
以得志今益州戶口百萬土沃財富誠得以為  
資大業可成也昭烈曰今指與吾為水火者曹  
操也操以急吾以寬操以暴吾以仁操以譎吾  
以忠每與操反事乃可成耳今以小利而失信  
義於天下奈何統曰亂離之時固非一道所能  
定也且兼弱攻昧逆取順守古人所貴若事定  
之後封以大國何負於信今日不取終為人利  
耳昭烈以為然

胡氏曰玄德所以荅龐士元者王道也顧  
人材力各有限量雖智及之而勇不能以  
自進猶挽弓者將滿而未盡何用力之難  
也玄德終守信義以待天命則庶幾於文  
王矣雖然有湯武反之之學則達未達之  
間此進德之難地也

乃畱諸葛亮關羽張飛守荊州以趙雲領畱營  
司馬時孫夫人驕豪多將江東吏兵縱橫不法  
昭烈以雲嚴重故特任掌內事昭烈將步卒數  
萬人入益州孫權聞昭烈西上遣舟迎其妹而  
夫人欲將昭烈子禪東歸諸葛亮使張飛趙雲  
勒兵截江乃得禪還○劉璋敕在所供給昭烈  
昭烈入境如歸前後贈遺以巨億計昭烈自江  
州北由墊江水詣涪璋率步騎三萬餘人車乘  
帳幔精光耀日往會之張松令法正白昭烈便  
於會襲璋龐統亦曰今因會執之則將軍無用  
兵之勞而坐定一州也昭烈皆不聽

真氏曰按龐統之名亞於諸葛氏然其為  
昭烈謀者皆戰國權譎之術此非孔明之  
匹也

璋表昭烈領司隸校尉使擊張魯

昭烈表璋行鎮西大將軍領益州牧所將將士  
更相之適歡飲百餘日璋增其兵厚加資給使  
擊張魯又令督白水軍并軍三萬餘人車甲器  
械甚盛璋還成都昭烈北至葭萌厚樹恩德  
十七年冬十月曹操擊孫權呼昭烈自救昭烈

借兵於璋十二月璋敕關成勿與通昭烈據涪城  
昭烈在葭萌龐統謂曰陰選精兵晝夜兼道徑  
襲成都璋既不武又素無備大軍卒至一舉便  
定此上計也揚懷高沛璋之名將各杖強兵據  
守關頭聞數有牋諫璋使發遣將軍還荊州將  
軍遣與相聞說荊州有急欲還救之並使裴東  
外作歸形此二子既服將軍英名又喜將軍之  
去計必乘輕騎來見將軍因此執之進取其兵  
乃向成都此中計也退還白帝連引荊州徐還  
圖之此下計也若沉吟不去將致大困不可久  
矣及操攻孫權權呼昭烈自救昭烈貽璋書曰  
孫氏與孤本為唇齒而關羽兵弱今不往救則  
曹操必取荊州轉侵州界其憂甚於張魯魯自  
守之賊不足慮也因求益萬兵及資糧璋但許  
兵四千其餘皆給半昭烈曰吾為益州征強敵  
師徒勤瘁而積財吝賞何以使士大夫死戰乎  
張松書與昭烈及法正曰今大事垂立如何釋  
此去乎松兄廣漢太守肅恐禍及已因發其謀  
於是璋收斬松敕關成諸將文書皆勿復與昭  
烈關通昭烈大怒召白水軍督楊懷高沛責以



無禮斬之勒兵徑至關頭并其兵進據涪城  
十八年春正月操引兵還夏五月自立為魏公加  
九錫○劉璋遣其將吳懿等拒昭烈破之皆  
降進圍雒城

劉璋遣其將吳懿劉瑁冷苞張任鄧賢等拒昭  
烈皆敗退保綿竹懿詣軍降璋復遣護軍李嚴  
督綿竹諸軍以其壻費觀為參軍嚴觀亦降昭  
烈軍益疆分遣諸將平下屬縣劉瑁張任與璋  
子循退守雒城昭烈進軍圍之任勒兵出戰於  
馬橋軍敗而死懿字子遠陳留人隨劉焉入蜀  
時為中郎將嚴字正方南陽人少為郡吏以才  
幹稱劉表時率秣歸表卒西詣劉璋璋以為成  
都令復有能名後為護軍觀字賓伯江夏酈人  
也劉璋族舅之子又璋之壻也

秋八月馬超入涼州殺刺史韋康九月參軍楊阜  
起兵攻之超奔漢中

十九年春張魯遣超圍祁山曹操遣夏侯淵擊却  
之○軍師中郎將龐統卒

時攻雒城統中流矢遂卒年三十六昭烈痛惜  
之言及則流涕從事張存曰統雖盡忠然遠大

雅之義昭烈怒曰士元殺身成仁更為非耶  
存官拜統父為議郎

夏雒城潰進圍成都諸葛亮張飛趙雲引兵來會  
亮留關羽守荊州與飛雲將兵泝流西上克巴  
東至江州破巴郡太守嚴顏生獲之飛呵顏曰  
大軍既至何以不降而敢拒戰顏曰鄰等無狀  
侵奪我州我州但有斷頭將軍無降將軍也飛  
怒令左右牽出斫頭顏容止不變曰斫頭便斫  
頭何為怒耶飛壯而釋之引為賓客分遣趙雲  
從外水定江陽犍為飛定巴西德陽昭烈圍雒  
城且一年法正牋與劉璋為陳形勢疆弱且曰  
左將軍從舉兵以來舊心依依實無薄意愚以  
為可圖變化以保尊門璋不荅

馬超來降屯城北

超知張魯不足與計事又魯將楊昂等數害其  
能超內懷於邑昭烈使建寧督郵李恢往說之  
超遂從武都氏中密書請降昭烈使人止超而  
潛以兵資之超至今引軍屯城北城中震怖使  
帳下司馬張裔詣昭烈昭烈許裔禮其君而安  
其人又使從事中郎簡雍入城說璋恢字德昂

達寧俞元人也仕郡督郵郡貢於州未至乃北詣昭烈於綿竹裔字君嗣成都人

劉璋出降昭烈遷之於公安遂入成都領益州牧時城中尚有精兵三萬人穀帛可支一年張裔還璋乃開門與簡雍同與出降昭烈遷之於公安盡歸其財物佩振威將軍印綬昭烈入成都置酒大饗士卒取蜀中金銀分賜將士還其穀帛昭烈自領益州牧初昭烈圍成都曹操丞相掾趙雲曰劉玄德其不濟乎拙於用兵每戰則敗奔亡不暇何以圍人傅幹曰劉玄德寬仁有大度能得人死力諸葛亮達治知變正而有謀而為之相關羽張飛勇而有義皆萬人之敵而為之將此三人皆人傑也以玄德之略三傑佐之何為不濟和

開左將軍府以諸葛亮為君師將軍署府事

許靖為長史龐羲為司馬董和為掌軍中郎將與諸葛亮並署府事射援為議曹從事中郎伊籍為從事中郎劉巴馬良為掾馬勲殷純為屬靖字文休汝南平輿人少舉孝廉除尚書郎與吏部尚書周處沙汰濁穢進用荀爽陳紀等

卓怒殺懿靖奔豫揚諸州流落交趾劉璋召之  
入蜀為蜀郡太守昭烈圍成都將潰靖謀踰城  
出降昭烈以此簿之不用法正曰天下有獲虛  
譽而無其實者許靖是也然今始創大業天下  
之人不可戶曉宜加敬重以慰遠近之望從之  
羲河南人少為議郎劉焉據蜀羲與之通家乃  
携焉諸孫入蜀後拒張魯有功為巴西太守和  
字幼宰南郡枝江人也漢末率宗族迁蜀仕至  
成都令蜀俗奢侈四方莫比和躬率以儉風俗  
大變土豪悍和說璋轉巴東屬國都尉吏民老  
弱乞畝者數千人遷益州太守清約如前與蠻  
夷從事務推誠心蠻夷畏而愛之昭烈以靖中  
朝名士羲宿將和循吏故首舉而用之援字文  
雅扶風人籍字機伯山陽人少依劉表於荊州  
表卒自託於昭烈見待亞於麋竺孫乾蔣雍後  
遣使江東孫權聞其才辯欲折以辭籍適入拜  
權曰勞事無道之君乎對曰一拜一起未足為  
勞其機捷類此權甚異之與諸葛亮法正劉巴  
李嚴共造蜀科巴字子初零陵丞陽人初昭烈  
自樊南奔荆楚群士從之如雲而巴獨北詣曹

操操辟為掾遣招納長沙零陵桂陽會昭烈略  
有三郡巴事不成欲由交州道還京師時諸葛  
亮在臨蒸以書招之巴不從昭烈深以為恨巴  
遂自交趾入蜀依劉璋及璋迎昭烈巴諫曰左  
將軍雄人也入必為害既入巴復諫曰若使左  
將軍討張魯是放虎於山林也璋不聽巴閉門  
稱疾昭烈攻成都令軍中曰有害巴者誅及三  
族及得巴甚喜方圍城時昭烈與士衆約若事  
定府庫百物孤無與焉及拔成都士衆皆捨干  
戈赴諸庫藏競取寶物軍用不足昭烈甚憂之

巴曰此易耳但當鑄直百錢平諸物價令吏為  
官市昭烈從之數月之間府庫充實勲字盛衡  
巴西閬中人少以才幹顯故擢用之

即拜關羽董督荊州事張飛領巴西太守督閬中  
馬超為平西將軍督臨沮餘各進位有差

黃忠為討虜將軍趙雲為翊軍將軍麋竺為安  
漢將軍孫乾為秉忠將軍簡雍為昭德將軍吳  
懿為討逆將軍李嚴為興業將軍捷為太守劉  
琰為固陵太守鄧方為朱提太守陳震為汶山  
太守劉苞為江陽太守輔匡為巴郡太守黃權

費觀為偏將軍劉璋子循為奉車中郎將昭烈  
養子封為副軍中郎將來敏為典學校尉周群  
為儒林校尉許慈胡潛為博士孟光為議郎王  
連為什方令蔣琬為廣都長忠字漢升南陽人  
劉表時為中郎將守長沙攸縣昭烈定江南遂  
委質從之及隨入蜀每有攻戰忠常先登陷陣  
勇冠三軍琰字威碩魯國人豫州時為從事邕  
字南和義陽人匡字元弼襄陽人琰方震邕與  
仁皆自荊州隨從入蜀權字公衡巴西閬中人  
自益州主簿出為廣漢長初劉璋迎昭烈權諫  
曰左將軍有驍名今請到欲以部曲遇之則不  
藩其心欲以賓客禮待則一國不容二主若容  
有泰山之安則主有累卵之危矣可但閉境以  
待時清璋不聽敏字敬達新野人善左氏春秋  
群字仲直巴西閬中人學於廣漢楊厚厚高弟  
任安數學甚精群名行亞之慈字仁焉南陽人  
師劉熙學鄭氏五經論語潛字公興魏郡人通  
漢朝制度喪紀服數光字孝裕洛陽人通公羊  
春秋尤長於兩漢舊典時光與來敏皆耆儒宿  
士敏主左氏而光善公羊每爭此義至於失色

竟不能一連字文儀南陽人為劉璋梓潼令昭烈入蜀所在郡縣皆望風景附獨連及廣漢長黃權閉城堅守須璋稽服乃降

徐衆評曰權既忠諫於主又閉城拒守得事君之禮昭烈假權偏將軍善矣然猶未足彰忠義之節也

琬字公琰零陵湘鄉人隨昭烈入蜀既為廣都衆事不治昭烈因游觀奄至其縣琬時又沈醉大怒將加罪戮諸葛亮請曰蔣琬社稷之器非百里才也其為政以安民為本不以修飾為先

願主公重加察之昭烈雅敬亮乃不加罪但免官而已○昭烈初定益州議者欲以成都名田宅分賜諸將趙雲曰霍去病以匈奴未滅無用為家今國賊非但匈奴未可求安也須天下都定各反桑梓歸耕本土乃其宜耳益州人民初罹兵革田宅皆可歸還令安居復業然後可役調得其歡心不宜奪之以私所愛也昭烈從之置益州官屬

王謀為別駕從事彭萊為治中從事何宗程畿為從事祭酒杜瓊為議曹從事費詩為督軍從

事尹默為勸學從事龔祿等為部從事張翼李  
恢李福等為書佐於是董和黃權李嚴等本璋  
之所授用也吳懿費觀等璋之婚親也彭萊璋  
之所擯棄也劉巴宿昔之所忌恨也昭烈皆處  
之顯任盡其器能有志之士無不競勸益州之  
民是以大和謀字元泰漢嘉人有容止操行時  
為劉璋治中萊字永年廣漢人身長八尺容貌  
甚偉昭烈將攻成都萊往見之龐統法正並為  
薦達昭烈亦奇其才奉使稱意識遇日加益州  
平未幾坐謗訕誅年三十七宗字彥英蜀郡郫  
人學於任安精究其術畿字季然巴西閬中人  
劉璋時為漢昌長時有人讒巴西太守龐羲欲  
叛者羲甚懼欲謀自守遣畿子郁索兵畿曰本  
不為叛要在盡誠若遂懷異志非畿所聞并教  
郁曰我受州恩當為州牧盡節汝為郡吏當為太  
守効力羲使人告曰尔子在郡家將及禍畿曰  
樂羊飲子之羹非父子無恩大義然也羲懼不  
敢為異瓊字伯瑜成都人與何宗共學於任安  
亦能精究其術詩字公舉犍為南安人劉璋時  
為緜竹令默字思潛梓潼涪人遠游荊州從學



於司馬徽宗忠左氏春秋及諸經史皆背誦之  
祿字德緒巴西安漢人翼字伯恭隸為武陽人  
福字孫德梓潼涪人

以法正為揚武將軍蜀郡太守

正外統都畿內為謀主一殮之德睚眦之怨無  
不報復擅殺毀已者數人或謂諸葛亮曰法孝  
直太縱橫將軍宜啓主公抑其威福亮曰主公  
之在公安也北畏曹操之強東憚孫權之逼近  
懼孫夫人生變於肘腋孝直為之輔翼令翻然  
翱翔不可復制如何禁止孝直使不得少行其

志耶

蜀漢本末卷上

四四

真氏曰按孔明之不抑制法正孫盛譏其  
非蓋嘗思之孝直前獻策以取益州後獻  
策以取漢中玄德立國巴蜀根本乎此其  
智謀若是豈易得哉其報復恩讎過於明  
白誠非厚德之士而專權擅殺其罪尤所  
當誅然當草昧之時須才以濟則固不得  
而遽廢也故孔明權其重輕姑略其過使  
展盡其才此執經守文之士所不識也

諸葛亮佐昭烈治蜀頗尚嚴峻人多怨嘆者法

正謂曰昔高祖入關約法三章秦民知德今君假借威力跨據一州初有其國未垂惠撫且容主之義宜相降下願緩刑弛禁以慰其望亮曰君知其一未知其二秦以無道政苛民怨匹夫大呼天下土崩高祖因之可以弘濟劉璋暗弱自焉以來有累世之恩文法羈縻互相承奉德政不舉威刑不肅蜀土之士專權自恣君臣之道漸以陵替寵之以位位極則賤順之以恩恩竭則慢所以致敵害矣由於此吾今威之以法法行則知恩限之以爵爵加則知榮榮恩並濟上下有節為治之要於斯而著矣

霍峻為梓潼太守

昭烈之襲劉璋也留中郎將霍峻守葭萌城張魯遣揚昂誘峻求共守城峻曰小人頭可得城不可得昂乃退後璋將扶禁向存等帥萬餘人由閬水上攻圍峻且一年峻城中兵纔數百人伺其怠隙選精銳以擊大破之斬存昭烈既定蜀乃分廣漢為梓潼郡以為太守峻字仲邈南郡枝江人

秋七月曹操擊孫權○冬十一月曹操弒皇后伏

氏及皇子二人

昭烈聞后被弑發喪制服曰老賊不死禍亂未已也

二十年春正月操女為皇后三月操擊張魯○夏昭烈與孫權分荊州使關羽屯江陵

權遣中司馬諸葛瑾求荊州諸郡昭烈不許曰吾方圖涼州涼州定乃盡以荊州相與耳權忿之遂置長沙零陵桂陽長史關羽盡逐之權大怒遣呂蒙督兵二萬以取三郡蒙移書長沙桂陽皆望風歸服惟零陵太守郝普城守不降罷烈聞之自蜀親至公安遣關羽爭三郡權進屯陸口為諸軍節度使魯肅將万人屯益陽以拒羽肅邀羽相見因責數羽羽曰烏林之役左將軍身任行間戮力破敵豈得徒勞無一塊土而足下來欲收地邪肅曰不然始與豫州覲於長坂豫州之哀不當一校計窮慮極圖欲遠竄主上矜愍豫州身無處所不愛土地士民之力以濟其患而豫州私獨飾情愆德墮好今已藉手西州又欲剪并荆土斯蓋凡夫所不忍行而况整領人物之主乎羽無以答

胡氏曰魯肅責關羽盛稱豫州長坂之寨以倭孫權假地之德羽遽無以對何也若應之曰曹操南伐大治水軍金鼓震蕩江海搖動吳之君臣救亡不給益州躬提万衆往為犄角之助協規同力竟破操軍于時諸葛軍師親使于吳面陳鼎足之勢貴公大悅尋表益州領荊州牧若取劉璋則非奪之於吳見可而進自軍之善政耳今吳乃置長沙桂陽零陵三郡長吏而謂益州愆德墮好可乎曹操惟外以挾漢為名而內欲自取也故益州與貴公相與治之若但與斥廣土宇背信自濟又何以伐操乎如此則理明義直肅不復有言矣

權又飛書召呂蒙攻零陵蒙詐普降之曹操將攻漢中昭烈懼失益州使使求和於權權令諸葛瑾報命更尋盟好遂分荊州以湘水為界長沙江夏桂陽以東屬孫氏南郡零陵武陵以西屬昭烈瑾亮之兄也奉使至蜀與亮但公會相見退無私面後或言於孫權瑾別遣親人與昭烈相聞者權曰子瑜與孤從事積年恩如骨肉

玄德昔遣孔明至吳孤嘗語子瑜曰卿與孔明同產且弟隨兄於義為順何以不畱孔明孔明若畱從卿者孤當以書解玄德子瑜荅曰弟亮已失身於人委質定分義無二心弟之不畱猶瑾之不往也其言足貫神明今豈當有此乎秋七月曹操取漢中走張魯畱其將夏侯淵張郃守之而還

操入南鄭主簿劉曄說操曰劉備人傑也有度而遲得蜀日淺蜀人未恃也今破漢中蜀人震恐其勢自傾以公之神明因其傾而壓之無不克也若小緩之諸葛亮相明於治國而為相關羽張飛勇冠三軍而為將蜀民既定據險守要則不可犯矣今不取必為後患操不從○昭烈外出諸葛亮常鎮守成都足兵足食

真氏曰按此即高祖任蕭何之意昭烈下公安故曹操因此定漢中非亮守蜀蜀亦危矣

八月孫權攻合肥大敗而還○冬十一月張魯降於曹操○將軍黃權擊巴賓破之張魯之去也權言於昭烈曰若失漢中則三巴

不振此為割蜀之股臂也昭烈乃以權為護軍  
率諸將迎魯魯已降操權遂擊諸夷帥朴胡杜  
獲任約破之

曹操使張郃徇三巴張飛邀擊大破之

操使郃督諸軍徇三巴欲徙其民於漢中進軍  
宕渠昭烈使巴西太守張飛拒之凡五十餘日  
飛率精卒萬人從它道邀郃交戰山道狹前  
後不得相救遂破郃軍郃棄馬緣山獨與麾下  
十餘人從間道走還南鄭巴土獲安昭烈亦還  
成都

二十一年操自進爵魏王

二十二年春正月操擊孫權軍三月權請降於操  
夏四月操用天子車服出入警蹕○冬昭烈進兵  
漢中操遣將曹洪拒之

法正說昭烈曰曹操一舉而降張魯定漢中不  
因此勢以圖巴蜀而留夏侯淵張郃屯守身遽  
北還此非其智不逮而力不足也必將內有憂  
備故耳今策淵郃才略不勝國之將帥卒衆往  
討必可克之克之日廣農積穀觀釁伺隙上  
可以傾覆寇敵尊獎王室中可以蚕食雍涼廣

托境土下可以固守要害為持久之計此蓋天  
以與我時不可失也昭烈善其策乃率諸將進  
兵漢中遣張飛馬超吳蘭等屯下辨操遣其大  
將曹洪拒之

二十三年春將軍吳蘭與洪戰於下辨敗績死之  
洪擊破蘭軍三月張飛馬超引軍還

夏四月擊張郃不克

昭烈屯陽平關夏侯淵張郃徐晃等來與相拒  
昭烈遣將軍陳式等絕馬鳴閣道為徐晃所破  
張郃屯廣石昭烈攻之不克急書發益州兵諸

蜀書卷之六

葛亮以問從事楊洪洪曰漢中益州之咽喉存  
亡之機會若無漢中則無蜀矣此家門之禍也  
發兵何疑時法正從昭烈北行亮於是表洪領  
蜀郡太守衆事皆辦遂使即真初犍為太守李  
嚴辟洪為功曹掾嚴未去犍為而洪已為蜀郡  
洪舉門下書佐何祗有才策洪尚在蜀郡而祗  
已為廣漢太守是以西土咸服諸葛亮能盡時  
人之器用也洪字季休犍為武陽人祗字君肅

蜀郡人

秋七月操擊昭烈九月至長安

二十四年春正月將軍黃忠擊夏侯淵破斬之  
昭烈與淵相拒踰年昭烈自陽平南渡沔水緣  
山稍前營於定軍山淵引兵爭之法正曰可擊  
矣昭烈使討虜將軍黃忠乘高攻之忠推鋒必  
進勸率士卒金鼓震天呼聲動谷淵軍大敗斬  
淵及益州刺史趙顛張郃引兵還陽平

三月操出斜谷將軍趙雲擊其軍敗之夏五月操  
引還昭烈遂取漢中

操自長安出斜谷軍遮要以臨漢中昭烈曰曹  
操雖來無能為也我必有漢川矣乃歛衆拒險

蜀漢志卷之五

五一

終不交鋒操運米北山下黃忠引兵欲取之過  
期不還翊軍將軍趙雲將數十騎出營視之值  
操揚兵大出雲猝與相遇遂前突其陣且闔且  
却操兵散而復合追至營下雲入營更大開門  
偃旗息鼓操兵疑雲有伏引去雲雷鼓振天惟  
以勁弩於後射操兵操兵驚駭自相蹂踐墮漢  
水死者甚多昭烈明日自來至雲營視昨戰處  
曰子龍一身都為膽也操與昭烈相守積月軍  
士多亡操悉引出漢中諸軍還長安昭烈遂有

漢中



遣兵攻房陵上庸皆拔之

昭烈遣宜都太守孟達從秭歸北攻房陵殺太守蒯祺又遣副軍中郎將劉封自漢中乘沔水下統達軍與達會攻上庸上庸太守申耽舉郡降加耽征北將軍領上庸太守以耽弟儀為建信將軍西城太守達字子敬避昭烈叔父之諱改子度扶風人建安初與同郡法正避亂入蜀

蜀漢本末卷上



